



Sud Bosne i Hercegovine
Суд Босне и Херцеговине

Broj: S1 3 Iž 043000 22 Iž
Sarajevo, 10.06.2022.godine

Sud Bosne i Hercegovine u Sarajevu, u apelacionom vijeću sastavljenom od sudija Vesne Trifunović, kao predsjednika vijeća, Dinke Beslagić-Čovrk i Zvezdane Antonović, kao članova vijeća, odlučujući o žalbi Sendić Isama iz G., ul. ..., izjavljenoj protiv rješenja Centralne izborne komisije Bosne i Hercegovine, broj: 06-1-07-1-720/21 od 19.05.2022.godine, o davanju saglasnosti za imenovanje članova Gradske izborne komisije Gradačac, u nejavnoj sjednici, održanoj dana 10.06.2022. godine, donio je

R J E Š E N J E

Žalba se odbija kao neosnovana.

O b r a z l o ž e n j e

Rješenjem Centralne izborne komisije Bosne i Hercegovine, broj i datum navedeni u uvodu, data je saglasnost na rješenje Gradskog vijeća Gradačac broj: 01-04-58/22 i od 03.03.2022.godine, kojim se na dužnost u članstvu Gradske izborne komisije Gradačac imenuju 1. Nataša Perić, članica, 2. Nihad Smajlović, član.

Žalitelj je blagovremeno uložio žalbu na navedeno rješenje zbog nepotpuno i nepravilno utvrđenog činjeničnog stanja i pogrešne primjene materijalnog prava.

U žalbi navodi da je direktno oštećen na provedenom konkursu za izbor članova Gradske izborne komisije Gradačac, navodeći da je nakon provedene procedure rangiran kao ubjedljivo najbolji kandidat sa 14 bodova, ali da je kasnije u prijedlogu za Gradsko vijeće umjesto njega predložen trećerangirani kandidat Nihad Smajlović. Ističe da je diskriminisan zbog nacionalnog izjašnjenja. Imajući u vidu procentualnu zastupljenost stanovništva u Gradačcu sa posljednjeg popisa iz 2013. Godine prema kojem 94,4% stanovništva čine Bošnjaci podnositelj žalbe smatra da Grad Gradačac nije u obavezi garantovati mandate kategoriji Ostalih. Osim toga ima saznanja da se kandidat koji je predložen umjesto njega nedavno izjasnio drugačije prilikom popunjavanja obrasca prijave Agencije za državnu službu, te da je CIK BiH naknadno tražila da oba izabrana kandidata dostavljanje modifikovanih izjava o nacionalnoj pripadnosti.

Konačno predlaže da apelaciono odjeljenje Suda BiH poništi pobijano rješenje Centralne izborne komisije Bosne i Hercegovine.

U odgovoru na žalbu Centralna izborna komisija Bosne i Hercegovine je predložila da se žalba odbije kao neosnovana.

Ispitujući ožalbenu odluku u okviru žalbenih navoda, vijeće Apelacionog odjeljenja Suda BiH je odlučilo kao u izreci iz sljedećih razloga:

Žalba nije osnovana.

Iz obrazloženja ožalbenog rješenja proizilazi da prije davanja saglasnosti, navodi žalbe i odgovora na žalbu, saglasno potvrđuju da je na teritoriji opštine Gradačac prema posljednjem popisu stanovništva 94,35% se izjasnili kao Bošnjaci, 2,34% kao Hrvati, 0,88 kao Srbi i 1,86% kao Ostali. Iz predmeta spisa proizilazi da su izabrana dva kandidata od čega su jedna Srпкиnja, i jedan kandidat iz reda Ostalih a da žalitelj koji je iz reda Bošnjaka, kao prvorangirani, nije izabran.

Odredbom člana 2.12. stav (5) Izbornog zakona Bosne i Hercegovine („Sl. glasnik BiH“, broj: 23/01,7/02, 9/02, 20/02, 4/04, 25/05, 65/05, 77/05, 11/06, 24/06, 32/07, 37/08, 32/10, 18/13, 7/14 i 31/16) je propisano da članove općinskih i gradskih izbornih komisije imenuje općinsko vijeće, odnosno skupština općine, uz saglasnost Centralne izborne komisije Bosne i Hercegovine, na osnovu javnog oglasa po proceduri koju utvrđuje Centralna izborna komisija Bosne i Hercegovine.

Uvidom u spis i dostavljenu dokumentaciju i evidencije, prema shvatanju apelacionog vijeća, CIK BiH je pravilno utvrdila da imenovanina dužnost u članstvu Gradske izborne komisije Gradačac i to Nataša Perić, Bojanić, članica, i Nihad Smajlović, član ispunjavaju uslove propisane odredbama Izbornog zakona Bosne i Hercegovine i da je ispoštovana procedura iz 7,8,9,10 i 13 stav (1) Uputstvom o utvrđivanju kvalifikacija, broja, imenovanju i razrješenju i obuci članova izborne komisije osnovne izborne jedinice u Bosni i Hercegovini.

Imenovanjem kandidata za članove Gradske izborne komisije Gradačac koji su se izjasnili na način da je jedan iz reda srpskog naroda i jedan član iz reda ostalih, postupljeno je u skladu sa odredbom člana 2.14 Izbornog zakona BiH, jer takav sastav Gradske izborne komisije Gradačac odražava zastupljenost konstitutivnih naroda uključujući i ostale, prema posljednjem popisu stanovništva provedenom na državnom nivou.

Posebno kada se ima u vidu da Gradska izborna komisija broji pet članova i to dva iz reda Bošnjaka (Hajrudin Hasanbašić i Amel Avdić), jedan iz reda Hrvata (Valerija Kasumović), jedan iz reda Srba (Nataša Perić) i jedan iz reda Ostalih (Nihad Smajlović) iz čega proizilazi da je sastav multietničan, pa imenovanjem podnosioca žalbe koji se izjasnio kao pripadnik bošnjačkog naroda bi poremetilo tu zastupljenost na način da ne bi bili zastupljeni pripadnici iz reda Ostalih, što nije u skladu sa imeprativnom odredbom člana 2.14 stav (1) Izbornog zakona BiH u dijelu nacionalnog sastava Gradske izborne komisije Gradačac.

Obzirom na navedeno, po ocjeni ovog vijeća, pobijana Odluka Centralne izborne komisije BiH je pravilna i zakonita, a žalba neosnovana, pa je istu, primjenom odredaba člana 81. stav 1. Zakona o upravnim sporovima Bosne i Hercegovine (Službeni glasnik BiH, broj 19/02, 88/07, 83/08 i 74/10), valjalo odbiti.

**PREDSJEDNIK VIJEĆA
SUDIJA**

Vesna Trifunović

2